

明世宗實錄

卷一〇〇至一三五

嘉靖八年四月至十一年二月

明世宗肅皇帝實錄卷之一百

嘉靖八年四月丙寅朔時享

太廟。世廟。陞河南右布政使周用爲都察院右副都御史

提學南贛汀漳等處軍務。丁卯。上御經筵左庶子盛端明

進講孟子詞氣迫切侍班給事中劉世揚等糾奏之。上曰講

官須慎選以克如端明者誠無益也。令吏部別用。遂調南京尚

尚寶司卿。賜伊王許淳府第樓名崇善從其請也。戊辰陞

南京禮部祠祭司郎中王黨爲浙江按察司副使南京刑部四

川司郎中齊之鸞爲陝西按察司僉事廣東廣州府同知莫相

爲廣東按察司僉事。大學士楊一清等言大明會典一書誠

國家典禮所係昨已奉旨令諸司纂集近來條例送翰林院重

訂仍乞賜勅命官開館纂修以成盛典。上從之。乃降勅曰朕

恭承天命入繼祖宗大統君臨天下凡致治保邦之道遠
稽古典近守祖宗成法夙夜祗慎罔敢違越仰惟我皇伯
考孝宗皇帝命儒臣纂修大明會典一書我聖祖神宗累
朝以來創業垂統守成致治凡官職制度事物名數儀文等級
宏綱衆目本末備書因時修政損益具載大要以祖宗舊制
爲主節年事例附書于後我皇兄武宗皇帝又命儒臣再加
參校重進然後刊印頒行朕萬幾之暇時取展閱或因裁決政
務檢尋事始每見其間記載失真文辭抵牾者比比有之朕惟
此一代通典百司之所遵行後世以之爲據豈宜有此錯誤彼
時纂修者既失于精詳總裁者又不能訂正均難辭責然亦因
舉行稍遲先朝之事故老凋喪案卷磨滅典籍無考致有前
失及今修改猶或可及不然歲復一歲逾遠逾忘終難考訂且

自弘治十五年纂修之後至今二十有八年典禮之因革事例之增損又復煩多恐數十年之後卷冊浩穰條貫繁瑣失真之弊入或如前已納卿等之言先令六部都察院通政使司大理寺等衙門各委屬官將所載各司事例再行檢查校勘若有差錯備細貼註明白送史館改正仍將弘治十五年以後至嘉靖七年續定事例照前例查出纂集校勘停當寫成上進續修附入今聞纂集將完特命卿等擇日開館仍催促各該衙門責限完進卿等分俵各館命官纂修其體例一遵舊典不必立異更張但要正其差訛補其脫漏其修書後二十八年之事務要悉心考究凡損益同異具事繫年條分類列通前粹爲一書以成一代完典使天下臣民知所趨向同歸皇極卿等其督率各官供職勤事所貴文質得中事理兼備失之前者得正之于後行

諸後者可質之于今斯副朕法 祖圖治之意毋或承訛就簡
以蹈前愆又或玩時愒日以招後議皆非朕所望焉其總裁副
總裁纂修等官職名并合行事宜陸續開具來聞爾等欽哉欽
哉遂命一清及大學士張璫桂萼崔鑒吏部尚書兼翰林院學
士方獻夫爲總裁官詹事府詹事兼翰林院學士霍縉顧鼎臣
爲副總裁官太常寺少卿兼侍讀謝丕左春坊左庶子兼侍講
學士穆孔暉右春坊右庶子兼修撰方鵬侍讀學士許成名侍
講學士張朝許誥席春南京翰林院侍講學士吳惠右春坊右
諭德彭澤右中允廖道南右贊善林文俊蔡昂修撰倫以訓龔
用卿王用賓編修王教張星徐階楊維傑歐陽衡金璫張袞歐
陽德爲纂修官太常寺卿劉榮中書舍人凌楫爲催纂官尚寶
司卿邵文思尚寶司卿兼侍書徐富司丞張天保林應椿吏部

主事張文憲大理寺左評事岳梁中書舍人康世鳳謝正李宏
劉煒張湘鴻臚寺序班王應芳楊武桂林吳昂章鳴鳳全綺劉
鎧周浚童瑞爲謄錄官大理寺左評事郭晟翰林院孔目朱福
爲收掌文書官。己巳大學士楊一清等奉旨考選庶吉士以
唐順之陳束任翰三人廷試策爲上所批獎卽以爲冠而取
胡經盧淮諸邦憲汪大受郭宗臯蔡雲程楊祐汪大淵王表曹
汴王穀祥熊過安如山鄭大同李實孫光輝吳子孝等二十八
人疏具其名因請令官教習。上曰吉士之選乃我太宗之制
其在當時固爲盡善但邇年以來每爲大臣徇私選取市恩立
黨自此始矣于國何益自今不必選留唐順之等一體除用果
有才行卓異問學優正者吏部舉奏收之翰林以備擢用朕意
如此吏禮二部及翰林院會議以聞于是吏部尚書方獻夫等

議奏曰館閣爲儲才之地于進士中選俊異者培養其間以備任使 祖宗之法誠至善也邇來收選未公乃奉行者之未善耳今奉 聖諭不必選留臣等無容別議顧翰林員額載之職掌者有數近以收用吉士及陞遷太濫遂溢于常額官無定員是非可久之道也乞于職掌外量增數員著爲成法每科一甲三人有缺卽銓註無缺則添註餘皆從吏部遇缺推補如諸司例凡兩京及在外官員果有學行可任者卽推用之其中有弗稱者亦令外補如此則事體畫一經久可行疏詔如議行侍讀侍講修撰各增爲三員編修檢討各增爲六員著爲令。巡撫甘肅都御史唐澤言哈密等處進貢夷人每沿途寄住販易謀利經年不歸甚有前貢者復充後貢人數更名冒進起送者騷擾驛路存留者耗費月糧殊非中國防邊之體乞爲議度禮部

尚書李時履言欲革其弊當清其源回夷入貢惟利是圖而導之爲姦則伴送道事諸人是也今宜令肅州兵備及鎮巡諸司每遇貢使人關必驗其方物之數併籍諸夷年貌委官押送入京計程定限踰期者罪之又貢還則禮兵二部各委一官查核賞賜諸物有夾帶別物者俱爲禁革仍令序班送至甘州驗放出關如是則禮法兼盡弊端可革而撫順采遠之道得矣詔如議行。庚午陞翰林院編修應良爲山東按察司副使。應天府府尹陳錫引疾乞致仕許之。卒未改撫治鄖陽右副都御史徐瓚巡撫河南。命坐營官伏羌伯毛江掌府軍前衛事仍兼營務。壬申陞巡撫甘肅右副都御史唐澤爲戶部右侍郎。上諭吏部甘肅虜情叵測速舉代澤者以聞吏部言陝西布政使司右叅政趙載可。上從之命陞載都察院右僉都御史。

往代澤。設遼東廣寧等十八衛陰陽醫學。追封伊厲王夫人丁氏伊簡王夫人任氏俱爲次妃從伊王訐淳奏也。禮部鑄印局儒士諸應瑞奏言天下文移印篆多有訛舛如汚陽州汚字訛篆爲泛字如此類者未可枚舉乞勅禮部擇委屬官精通六書者提督考正。上嘉應瑞能查舉差訛留心本業命禮部專委主事一人提督本局。癸酉陞南京大理寺右寺丞林有孚爲大理寺右少卿。命兵部尚書李承勛兼提督國營軍務初伍文定既罷承勛等會舉左右侍郎王廷相黃衷俱可任提督因言今方裁革冗員國營似不必專官正德初許進爲兵侍提督營務仍管部事今惟上裁上曰卿既言專官似冗然必諳練戎務者方可兼此其即以煩卿不妨部事兼提督之毋辭。命署都督僉事陳斌僉書後軍都督府事東寧伯焦棟

爲營武營坐營管操官隆平侯張瑋爲五軍營坐營管操官。以萬全都司署都指揮同知張鎮充副總兵官協守宣府地方。○甲戌戶部左侍郎王軌言臣奉命清查各處莊田見勲戚之家多者數百十頃占據膏腴跨連郡邑此後勲戚日增有限之士豈能應無己之求哉乞如成周之制隨其官之品級而定擬多寡別其世之親疎而量爲裁革其自置田土不報納糧差者俱追斷如功臣田土律庶幾爲經國裕民可久之道下戶部議尚書梁材言成周班祿而有土田蓋祿以田出也非于常祿之外復有土田之賜今勲戚高爵厚祿已踰涯分而陳乞地畝動以數十誠非祖宗立法之意自今宜申明詔旨不許妄爲奏討侵漁小民其已經欽賞有成命者仍與管業中有世遠秩降或非一派相傳者量存三之一以爲墓祭之費餘皆入官以備

邊儲 上然之因諭曰己賞田土亦宜查明有分外強占者俱
給原主自今勲戚大臣務各安分以保祿位不許妄行陳乞。
乙亥總理糧儲兼巡撫應天都御史陳祥以修省自陳乞罷不
允。代府管府事泰順王克燿奏稱臣考懿王當祔廟而代自
始封簡王至思王已盈五廟之數請定祔廟之制下禮部議尚
書李時言親王祔之禮會典未載臣等竊謂當推 太廟祔
祔之禮而降殺之今代府之廟當以始封簡王居中百世不遷
次戾王隱王思王爲五世今懿王入祔則戾王當以親盡
而祔但諸侯無祔廟戾王神主宜祔附入簡王之室置積藏之
隱王惠王思王以次上遷而懿王神主并祔于第五廟每歲暮
則出祔主行合祭之禮庶于禮制隆殺得宜詔如議。丙子禮
部右侍郎何塘以病乞休 上特予給假調治。國初南北直

隸及各省屯田子粒皆御史查覈正統間改在京各衛及北直隸屯田專設僉事管理列銜山東至是戶部尚書梁材言京師畿輔屯政日弛蓋由僉事權力不重皇親勲戚憑藉城社沮撓百出勢難管理自今請裁革僉事仍專差御史如南直隸例詔從之因命御史差三年一易○福建同安縣儒士李如玉纂集周禮會註十五卷令其子詣闕奏進詔嘉如玉苦心禮書令有司以禮獎勸給與冠帶榮身○大學士張璁以妻喪乞假治喪事上許之因諭之曰卿宜以國事爲重勉抑哀情以慰朕懷尋遣中使齎賜新鈔一萬貫白金五十兩紵絲四表裏仍賜祭二壇命有司治葬○大理寺卿陳璋以病乞休詔許回籍調治仍給驛歸○丁丑命甘肅督餉都御史劉天和兼總督三邊軍餉以虜久住套從總制尚書王瓊請也○戊寅陞浙江左布政

使潘旦爲都察院右副都御史撫治鄆陽地方。太子太保兵部尚書李承勛以宣大有警請如故事遣大臣一人經畧邊務。上曰官不必遣第馳諭巡撫官令其用心籌畫如見在糧草幾何各處墩堡邊牆修廢若何軍士強弱將官貪廉若何凡戰守事宜務一一計處以聞毋怠忽慢事。鎮守陝西都督同知魯經再以疾乞辭任。上優詔褒留不允。己卯戶部尚書梁材等初奉旨會議天下歲用錢糧至是以條列以進一議王府祿米言邇來宗支繁衍而歲供每稱不給是不可不慮也爲今之計有三曰申嚴妄濫之限使不得濫收過額以防他日詐冒之端曰收復官稅凡山場湖陂稅課河泊之類惟洪武永樂以前欽賜者仍與爲業其餘奏討者俱查復入官以補祿糧之缺曰處贖閒之役言王府旗校軍匠諸役無出外征操之苦其所

得月糧多寡不同宣量爲裁節月支三斗者如故自五斗至一石者俱令本折半給一議軍官俸糧言國初官有定員糧有定額今則傳乞陞授日漸加多俸糧不給今救弊之法有三曰清屯田宜申令管屯御史及僉事諸臣選委廉正指揮督率旗軍盡力開墾毋因循故事毋自爲占種毋妄報災傷曰嚴比試凡武官襲替毋論新舊俱令比試一試二試不中者食半俸三試不中者謫戍行考選于世襲之中庶無冒濫廩祿之弊曰定法令軍官有因事住俸者至事完之日方許復支其停支月日毋得朦朧補給其犯罪宜降革者卽爲降革免其立功毋令立功滿日冒復原職至于罷軟老疾帶俸閒住者原支本色俸米宜減其半改與折色一議裁冗食凡文武衙門傳陞乞陞大小官員宜量爲裁革存留者給半俸凡匠官老疾及藝業不精者宜

令閒住其藝精見役者亦與半俸至于軍民匠役自原額之外
凡嘉靖元年以後投充者盡革之各衛軍士亦宜汰老弱揀精
壯立爲城守定制餘者遣歸屯田一議節冗費過者內承運庫
採辦金寶香蠟之費光祿寺大官供給冒濫于舊額之外者
不下數十萬非可久之道也宜勅所司查明可能者罷之省一
分國有一分之益寬一分民受一分之賜一議處逋欠邇來司
府州縣催徵錢糧率于起運者留心督促以估才名而存留者
漫不爲意故王府祿糧官軍俸給空乏爲多今宜申明條例凡
起解存留錢糧及屯田子粒越限不能徵完者撫按奏聞降罰
有差則人知所警而逋欠者寡矣惟上裁查得旨軍官降革
立功及帶俸閒住支半俸例仍再議以聞餘悉如擬于是戶部
復會官議言宗室本色祿米扈從文武群臣本色俸糧當國家

財用豐盈之時亦已裁節內府供事與各衙門工匠官員皆有朝夕服役之勞亦僅支半俸軍職閒住者既無着伍差操之勤又無軍政管事之責在內享優游之樂在邊免鋒鏑之患乃與服勞執役官員同支全俸非宜臣等以爲宜如前擬支半俸使得旨命如舊支全俸第令兵部嚴舉比試犯堂冒保冒襲事例以清濫費。工部尚書劉麟言今漕河修治工可垂成而巡撫河南都御史潘瓚以致仕去恐因是中止則前功盡棄乞勅巡按御史胡效才兼理其事以期成功。上然之併令總理侍郎潘希曾與效才公同督視毋得推避致誤國儲。庚辰陞都察院右副都御史張璉爲戶部左侍郎南京都察院右副都御史蔣瑤爲工部右侍郎改南京大理寺卿崑浩爲大理寺卿。贈江西安仁縣陣亡醫學訓科倪洌爲德興縣縣丞命有司歲時